



Број/Број: **01/2а-50-1-2-69/10**
Сарајево/Sarajevo, 15.7.2010.

ZAPISNIK

69. sjednice Komisije za vanjske poslove Predstavničkog doma Parlamentarne skupštine BiH, održane 14.7.2010.

Sjednica Komisije počela je u 13 sati. Prisustvovali su: Slavko Matić, Azra Hadžiahmetović, Husein Nanić, Azra Alajbegović i Denis Bećirović.

Odsustvovali su: Milica Marković, Milorad Živković, Lejla Klokić i Sefer Halilović.

Osim članova Komisije, sjednici su prisustvovali: Senad Bužimkić iz Ministarstva vanjskih poslova BiH, Šerifa Godinjak iz Ministarstva civilnih poslova BiH i Miroljub Krunić iz Ministarstva finansija i trezora BiH.

Sjednicom je predsjedavao Slavko Matić. On je pozdravio prisutne i otvorio raspravu o dnevnom redu 69. sjednice Komisije.

Predsjedavajući Slavko Matić predložio je da zbog kratkoće vremena na dnevnom redu budu samo prve dvije tačke predloženog dnevnog reda, tj. Usvajanje Zapisnika i Davanje mišljenja o saglasnosti za ratificiranje.

Denis Bećirović kazao je da nije saglasan da se tačka 3. Izvještaji i materijali pristigli Komisiji skine s dnevnog reda. Riječ je, ipak, o zvaničnoj sjednici Komisije i predložio je da tačka 3. bude tačka 2. dnevnog reda. On je kazao da su informacije u podtačkama c) i d) vrlo važne i predložio da Komisija usvoji zaključak kojim predlaže Kolegiju da se one nađu na dnevnom redu sjednice Doma.

Slavko Matić saglasio se da se sve tačke predloženog dnevnog reda ostave i nakon toga je jednoglasno usvojen sljedeći

DNEVNI RED

1. Usvajanje Zapisnika 68. sjednice Komisije;
2. Davanje mišljenja o saglasnosti za ratificiranje:
 - a) Sporazuma između Vijeća ministara Bosne i Hercegovine i Vlade Republike Turske o saradnji u oblasti zdravstva (resorno ministarstvo: Ministarstvo civilnih poslova BiH);
 - b) Ugovora o jamstvu za kreditnu liniju Agencije za osiguranje depozita Bosne i Hercegovine između Bosne i Hercegovine i Evropske banke za obnovu i razvoj (resorno ministarstvo: Ministarstvo finansija i trezora BiH);

- c) Ugovora između Bosne i Hercegovine i Kraljevine Španije o izbjegavanju dvostrukog oporezivanja i sprečavanju fiskalne utaje u odnosu na poreze na dohodak i imovinu (resorno ministarstvo: Ministarstvo finansija i trezora BiH);
- 3. Izvještaji i materijali pristigli Komisiji:
 - a) Izvještaj sa 8. konferencije predsjedavajućih parlamenata zemalja članica “Proces saradnje u Jugoistočnoj Evropi”, Antalija, Turska, 5.–8.6.2010.,
 - b) Informacija Ministarstva odbrane BiH o obavezama Bosne i Hercegovine za pristupanje Akcionom planu za članstvo u NATO-u (MAP),
 - c) Preporuka Evropskog parlamenta Vijeću EU o situaciji u BiH – Rezolucija o BiH/sjednica Evropskog parlamenta, Strasbourg, 16. i 17.6.2010. (materijal MVPBiH),
 - d) Rezolucija Evropskog parlamenta o situaciji u Bosni i Hercegovini;
- 4. Tekuća pitanja.

Ad.1. Usvajanje Zapisnika 68. sjednice Komisije

Zapisnik 68. sjednice usvojen je jednoglasno, bez primjedbi.

Ad.2. a) Davanje mišljenja o saglasnosti za ratificiranje Sporazuma između Vijeća ministara Bosne i Hercegovine i Vlade Republike Turske o saradnji u oblasti zdravstva

Denis Bećirović predložio je da se zbog kratkoga vremena ne ide s obrazloženjima predstavnika resornih ministarstva, već da predstavnici ministarstava odgovore na eventualna pitanja članova Komisije.

Slavko Matić konstatirao je da su članovi Komisije saglasni s prijedlogom Denisa Bećirovića i otvorio raspravu o Sporazumu između Vijeća ministara Bosne i Hercegovine i Vlade Republike Turske o saradnji u oblasti zdravstva.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.2. b) Davanje mišljenja o saglasnosti za ratificiranje Ugovora o jamstvu za kreditnu liniju Agencije za osiguranje depozita Bosne i Hercegovine između Bosne i Hercegovine i Evropske banke za obnovu i razvoj

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog ugovora.

Ad.2. c) Davanje mišljenja o saglasnosti za ratificiranje Ugovora između Bosne i Hercegovine i Kraljevine Španije o izbjegavanju dvostrukog oporezivanja i sprečavanju fiskalne utaje u odnosu na poreze na dohodak i imovinu

Nije bilo pitanja predstavniku resornog ministarstva i Komisija je jednoglasno dala pozitivno mišljenje Predstavničkom domu u vezi s ratifikacijom ovog ugovora.

Ad.3. Izvještaji i materijali pristigli Komisiji:

- a) Izvještaj sa 8. konferencije predsjedavajućih parlamenata zemalja članica “Proces saradnje u Jugoistočnoj Evropi”, Antalija, Turska, 5.–8.6.2010.

- b) **Informacija Ministarstva odbrane BiH o obavezama Bosne i Hercegovine za pristupanje Akcionom planu za članstvo u NATO-u (MAP)**
- c) **Preporuka Evropskog parlamenta Vijeću EU o situaciji u BiH – Rezolucija o BiH/sjednica Evropskog parlamenta, Strasbourg, 16. i 17.6.2010. (materijal MVPBiH)**
- d) **Rezolucija Evropskog parlamenta o situaciji u Bosni i Hercegovini**

Denis Bećirović kazao je da ne treba podsjećati da se institucije Bosne i Hercegovine posljednjih godina prilično ignorantski odnose prema stavovima Evropskog parlamenta, ali i drugih važnih evropskih institucija. On je istaknuo da kad kaže institucije BiH, ne stavlja sve u isti koš, ali da misli da generalno moramo promijeniti situaciju u tom pogledu. Dodao je da trebamo pokušati prekinuti ovu praksu ignorantskog odnosa prema Evropskom parlamentu i onome na šta ljudi iz Evrope upozoravaju nadležne u BiH. On je predložio da Komisija za vanjske poslove usvoji zaključak kojim predlaže Kolegiju Predstavničkog doma da se podtačke c) i d) iz treće tačke dnevnog reda zbog svog značaja uvrste u dnevni red iduće sjednice Doma, kako bi se mogli upoznati i raspravljati o ovim stvarima i donijeti neke zaključke.

Azra Hadžiahmetović kazala je da je saglasna s prijedlogom i da bi zajedno s ovim tačkama trebalo predložiti i Rezoluciju Vijeća Evrope o hitnim potrebama za ustavnim reformama u BiH s aprilskog zasjedanja PSVE-a.

Husein Nanić kazao je da je saglasan s prijedlogom i da bi to trebalo da bude stav Komisije prema Kolegiju.

Nakon toga Komisija za vanjske poslove jednoglasno je usvojila zaključak da predloži Kolegiju Predstavničkog doma da u dnevni red sljedeće sjednice uvrsti: **Preporuku Evropskog parlamenta Vijeću EU o situaciji u BiH i Rezoluciju Evropskog parlamenta, od 16. i 17.6.2010., o situaciji u BiH, te Rezoluciju Vijeća Evrope o hitnim potrebama za ustavnim reformama u BiH s aprilskog zasjedanja PSVE-a.**

Merdžana Iglica je u vezi s **Informacijom Ministarstva odbrane BiH o obavezama Bosne i Hercegovine za pristupanje Akcionom planu za članstvo u NATO-u (MAP)** kazala da je to stiglo na Kolegij, ali da je taj materijal dostavljen po zaključku Komisije za vanjske poslove sa 62. sjednice.

Azra Hadžiahmetović kazala je da ovu informaciju možemo ostaviti Kolegiju da odluči da li ovaj materijal zavređuje da se nađe kao posebna tačka dnevnog reda sjednice Doma.

Slavko Matić kazao je da nećemo pogriješiti ako prepustimo Kolegiju da procijeni da li taj materijal zavređuje i ima li potrebe da se nađe kao tačka dnevnog reda na sjednici Doma.

Nakon toga Komisija za vanjske poslove jednoglasno je usvojila **zaključak da ovaj materijal ustupi Kolegiju Predstavničkog doma kako bi on procijenio ima li razloga da se stavlja na dnevni red neke od narednih sjednica Predstavničkog doma.**

Komisija je primila k znanju ostale materijale iz tačke 3. dnevnog reda.

Ad.4. Tekuća pitanja

Azra Hadžiahmetović kazala je da od 27 zemalja članica EU četiri zemlje još nisu okončale postupak ratifikacije i predložila da se uputi dopis komisijama za vanjske poslove zemalja koje još nisu ratificirale Sporazum o stabilizaciji i pridruživanju kojim se traži da se ubrza proces ratifikacije.

Merdžana Iglica kazala je da je u zemljama koje nisu ratificirale Sporazum o stabilizaciji i pridruživanju proces ratifikacije u toku, da se nalazi u parlamentarnoj proceduri i da se računa da će do kraja septembra biti okončan postupak ratifikacije.

Slavko Matić kazao je da je potpuno nebitno da li je to u završnoj fazi i da nije naodmet da Komisija u primjerenom formi uputi dopis nadležnim komisijama parlamenta zemalja koje nisu ratificirale Sporazum, s molbom da se ubrza postupak ratifikacije i da se o tome ne trebamo ni izjašnjavati.

Nakon toga predsjedavajući Slavko Matić zahvalio se članovima Komisije i zaključio 69. sjednicu Komisije za vanjske poslove.

Sjednica je završena u 13,30 sati.

SEKRETAR KOMISIJE

Merdžana Iglica

PREDSJEDAVAJUĆI KOMISIJE

Slavko Matić

Dostavljeno:

- naslovu
- a/a